

Педагогический работник профессиональной машинной апаратуре лотков
кафедры центра – «Тонафты 13.ру»

В. Ф. Рогожина, этнокультурной образовательной лабораторией вятской

**МОКШЕНЬ КЯЛЬСА ПРИСУБСТАНТИВНО-АТРИБУТИВНОЙ
ТИПОНЬ СЛОЖНОПОДЧИНЁННОЙ ВАЛРИСЬМОТНЕНЬ
ТОНАФНЕМАСНА
(9-10 классь)**

**(ИЗУЧЕНИЕ СЛОЖНОПОДЧИНЕННЫХ ПРЕДЛОЖЕНИЙ
ПРИСУБСТАНТИВНО-АТРИБУТИВНОГО ТИПА В МОКШАНСКОМ
ЯЗЫКЕ)**

Финно-угрань кяльхненъ эса сложнай валрисьмотнень лангса покодсть
тяфтама ученайхне, кода Бузаков И. С. [1], Гордеев Ф. И. [2], Дубровина З.
М. [3], Рогожина В. Ф., Исаева Л. [4] и лиятне.

Кода содаф, мокшень кяльса валрисьмотне структурань коря эряйхть
простойхть и сложнайхть. Сложнай валрисьмотне эряйхть союз мархтот и
союзфтомот. Союз мархта валрисьмотне явондовихть кафта юромга:
сложносочиненнайхть и сложноподчиненнайхть.

Мокшень кялень синтаксисонь учебникса сёрматф, придаточнай
пяльксне, конат тиендъсазь шарьхкодевикс главнай пяльксонь кодамовок
членть, структурно-семантикань эсь лацонь ширеснон коряс явондовихть
колма группава: а) присубстантивно-атрибутивнайхть; б)
соотносительнайхть; в) изъяснительнайхт. [5]

Тя статьяса ванцаськ присубстантивно-атрибутивнай типонь
валрисьмотнень тонафневомаснон. Тяфтама типонь сложнай валрисьмотнень
эса придаточнай пялькссь фалу кандови главнай пяльксса моли
существительнайти. Главнай и придаточнай пяльксне фалу сотневихть фкя-
фкянь мархта союзнай валса. Сложноподчинённой валрисьмотнень эса
тяфтама придаточнай пяльксненъ функциясна определительнай. Сложнай
валрисьмотнень эса придаточнай пяльксне пшкотькшнесазь смузьса,
тиендъсазь сяда шарьхкодевикс главнай пяльксса моли существительнайть.
Ня существительнайхне главнай пяльксса эряйхть валрисьмонь эрь кодама
членкс. Кепотьксонди:

а) подлежащайкс: *Церькавсь, кона теенза мзярда-бди ульсь серидонга
серикс марнек масторлангса, тьяни бта кирсь, алнялгодсь* (И. Девин,
Нардише: 52). Тя кепотьксса придаточнай пялькссь кандови главнай пяльксть
эса существительнайти, кона ащи именительнай падежса указательнай
склоненияса фкя лувксса;

б) дополнениякс: *Тяда инголе Анясь кеняртъкинесь эрь каготкяти,
кона сашендсь сонъ лемозонза* (И. Девин, Нардише: 90). Тя кепотьксса

придаточной пялькссъ кандови главной пяльксть эса существительнайти, кона ащи дательной падежса указательной склоненияса фкя лувксса;

в) вастонь обстоятельствакс: *Верань путозь лазксти, кона ладяфоль шра лангс, пряпяльде шкай ужети* (И. Девин, Нардише: 113). Тя кепотьксса придаточной пялькссъ кандови главной пяльксть эса существительнайти, кона ащи именительной падежса указательной склоненияса фкя лувксса;

Пяк сидеста присубстантивно-атрибутивной типонь сложноподчиненной валрисьмотнень эса главной пяльксса существительнайсь сотови местоимения мархта. Кепотьксонд: *Аф сонцень Тучатянь, а уноконц кизефтеманц мархта токазе сире ломанть седиса ся ангорксть, кона кати кенерькшнесь кевонзамс, кати нинге аш* (И. Девин, Нардише: 233). *Шачсь мялец мрдамс куду, мрдамс кярьмодемс ся тевоцты, конань сон ушеткшнеше войнада инголе аш* (И. Девин, Нардише: 120).

Эряви азомс, станя же главной пяльксонь определяемой валть видеса молихть **ся** няфтемань и **стама** определительной местоимениятне, конатнень смузьснон панчсесыне определительной придаточной пялькссъ. Ня местоимениятне нолявихть снярда, мзярда эряви сяда шарьхкодевиста няфтемс, кодама главной валрисьмонь членти кандови придаточной пялькссъ или жа определяемой существительнайть лангс главной пяльксса шарфневи башка мяль: видеста ли кандови атрибутивной придаточнайсь тя или тона предметть лангс, а аф лия кодамовок тяфтама жа однородной предметонь лангс. Тяфтама придаточнайхнень эса фалу азондови ся предметть действиянц, состоянианц, свойстванц, качестванц колга, конат эсост эрсихть фалу или аф сембе пингть, а анычек кой-мзярс: «*Мон аф стама ломаттнень лацан, конат эрь ката мявкстомати синьцке аф содасазь месендихть*».

Присубстантивно-атрибутивной типонь сложноподчиненной валрисьмотнень эса главной пялькссъ мархта придаточнайхне сотовихть союзной тяфтама валхнень вельде:

а) **кона**: *Марявсь седиень ся элякодомась, кона улэнди иля праздникнень пингстовок и советскяйхнень, религизнайхнень* (И. Девин, Нардише: 182). *Самай эста Анянь пряса тарозевсь, бта сргозема ушедсь ся мяльсь, кона сонь тяни аф кадондсы васта ащема* (И. Девин, Нардише: 127). *Сязентьф-нозонтф шамац, кона ушедсь ни шить каршеса солсема, бта тундань горнама* (И. Девин, Нардише: 217). *И солдатсь, кона ётась пяле Европа и кона ниле кизот ашезе няенде сонь лац-ряц, лажадсь теензовок – нардишети* (И. Девин, Нардише: 53);

б) **кие**: «*Сон аф кельгсы стама ялгать, кие васькафнема туль*».

Ня союзной валхне согласовандайхть лувксонь и падежень коряс главной валрисьмоста определяндави существительнайть мархта. Союзной валхне васьфневихть аф анычек основной (аф определенной склоненияса), но тяфта же указательной (определенной) и притяжательной склонениясовок. Кепотьксонди:

а) союзной валсь ащи родительной падежса основной склоненияса: *Ломаттне ванондсть цёранять шири, мяргат ёразь куляксамс, сась али аш*

ся инвалид-солдатсь, конань кувалма азондовсь мороса (И. Девин, Нардише: 15);

б) союзной валсь ащи дательной падежса основной склоненияса: *Аня ванондозе кучкаста военнайтть и вешендсь нинге фкя карточка, конанди тьяса аш кода аф улемс ялгакс* (И. Девин, Нардише: 24);

в) союзной валсь ащи родительной падежса указательной (определённой) склоненияса: *Аверяскинонь «извинись!» и иля валонза, конатнень ашезень куле Анясь* (И. Девин, Нардише: 94);

г) союзной валсь ащи именительной падежса лама лувксса основной (аф определённой) склоненияса: *Ломаттне, кит юмафтозь шумбрашиснон войнаса, нялезь и марялезь: теест максф инь цебярьсь, мезьса кенерсь каземс природась Модать лангса эряфть* (И. Девин, Нардише: 119).

Станя же васьфневихть придаточной пяльксса и лия союзной валхт. Кепотьксонди:

а) **коса:** *Шачсь сон, кода тьячи мяляфтса, шобдавань зарянять ланга, - ушедсь азондома Цямкаерясь и озась вальмять ваксс эземти, коса стяда ащесь Анясь и нарнесь вальмя сельмонятнень* (И. Девин, Нардише: 7);

б) **коста:** *Тучатя шарфтсь шама пяльде ся шири, коса теенза арам, Ховань станциясь, коста сашендыхть сембе, кит мзярда-бди тушендсть кудста* (И. Девин, Нардише: 116);

в) **коза:** *Фкя эземсь, види ширденнесь, вельхтяфоль – фкя пелец акша клеёнкаса, омбоце палец – газетаса, аноклафоль топчан вастс, коза Аня кармай матнемост пекурмаса срядихнень* (И. Девин, Нардише: 56);

г) **кодамса:** *И Витя илядсь ся щамонзон мархта, кодамса прважась алянть пяли эряма* (И. Девин, Нардише: 315);

Эряви азомс, придаточной пяльксса союзной валхне васьфневихть валмельгакс мархта. Кепотьксонди:

а) **инкса:** *Няемс тага весть ся цёратнень, кинь инкса корхтафтсазь сонь велень келеса да сядонга товола?* (И. Девин, Нардише: 92). *Эряволь кярмодемс ся тевти, конань инкса Анянь ушеткинесть ни кельгомонза и шнамонза ломаттне* (И. Девин, Нардише: 126);

б) **кувалма:** *А вага тя ловажась, конань кувалма сон мярьгсь: наряжамс проворня* (И. Девин, Нардише: 111);

в) **эзда:** *Ломанць тёжянь вайгяльбе ширьгя ёталезень ся юрхнень, конатнень эзда шачендыхть кальдяв тефне* (И. Девин, Нардише: 125);

г) **мархта:** *Недяляшка ни симондихть сонь самогонкадонза Кержаев Сема и сонь ялганза – Курмышень цёратне, конатнень мархта сон ризносесы горянц-пичефксонц* (И. Девин, Нардише: 262).

Присубстантивно-атрибутивной типонь сложноподчиненной валрисьмотнень эса главной пяльксть мархта придаточнайхнень пялькссна сотовихть нинге подчинительной союз вельде:

а) **што:** *А главнайсь, мезсь петезе сонь седиенц и тиезе ломань сельмос аф виздезь ванькс, ся мяльсь, што сонь аляц ёфси аф мувору и стама жа, кода и велень лия ломаттне* (И. Девин, Нардише: 51). *Кудса тя васедемасть кувалма, што сон няезе шачфтома кудса врачть, Аня изь азонда* (И. Девин,

Нардише: 127). *Щетихинонь кувалма кулясь, што сон тусь Саранскяи и тоста изь мрда, куроқта срадсь марнек районга* (И. Девин, Нардише: 257).

Кода няеви кепотьксень вельде, придаточнай пяльксь фалу моли главнай пялькта меле, или сонь кучкасонза и путневи ся валда меле, конань сон тисы шарьхкодевикс.

Кона, кодама, кие, мезе союзнай валхне согласовандайхть лувксонь и падежень коряс главнай валрисьмоста определяндави существительнайть мархта. Кепотьксонди: *Курок цебярь кись аделавсь, ушедсть повондома карафт, лотконят, конат* пняиксет ведьта (И. Девин, Нардише: 55). *Пуроптозень весть Просаня кудозонза ялганзон, конат састь Саранскяйста и мянь Акишуста, ётксост Тарычень Глебаряське, озафнезень иранц перьф и ушедсь корхтама* (И. Девин, Нардише: 215).

Тевс нолдаф литературась

Бузаков. И. С. Сложное предложение в мордовских языках / И. С. Бузаков. – Саранск : Мордов. кн. изд-во, 1973. – 179 с. Бузаков. И. С. Сложное предложение в мордовских языках / И. С. Бузаков. – Саранск : Мордов. кн. изд-во, 1973. – 179 с.

Гордеев Ф.И. К вопросу о происхождении сложноподчиненных предложений в марийском языке / Ф.И. Гордеев // Вопросы теории и методики изучения русского языка. – Вып. 3. – Йошкар-Ола, 1964. – С. 91-98

Дубровина З. М. Сложноподчиненные предложения с придаточными уступительными в финском языке / З. М. Дубровина // Вопросы финно-угорской филологии. – Вып. 4, 1984. – С. 3-19.

Рогожина В. Ф., Исаева Л. Мокшень кяльса условиянь смузть няфтемац / В. Ф. Рогожина // Материалы докладов IX научной конференции молодых ученых, аспирантов и студентов (г. Саранск, 19-24 апреля 2004 г.). / МГУ им. Н.П. Огарева; филол. фак.; редкол.: М.В. Мосин (отв. ред.), А.М. Кочеваткин, Н.Д. Десяева и др. – Саранск, 2004. С. 77-79.

Мокшень кяль. Синтаксис : учебник / аноклаф-тиф Н. С. Алямкинонь и О. Е. Поляковонь профессорхнень вятемаснон ала. – . – Саранск : Изд – во Мордов. ун-та, 2008. – 200 с.

Девин. И. М. Нардише : роман / И. М. Девин. – Саранск : Мордов. кн. изд-во, 1969. – 424 с.